



SIARAN MEDIA KEMENTERIAN PERTANIAN DAN KETERJAMINAN MAKANAN

KUNJUNGAN HORMAT *SECRETARY OF THE PARTY COMMITTEE AND DIRECTOR-GENERAL, HUNAN PROVINCIAL SUPPLY AND MARKETING COOPERATIVE UNION* KE ATAS KETUA SETIAUSAHA KEMENTERIAN PERTANIAN DAN KETERJAMINAN MAKANAN

KUALA LUMPUR, 6 NOVEMBER 2025 – YBhg. Datuk Seri Isham bin Ishak, Ketua Setiausaha, Kementerian Pertanian dan Keterjaminan Makanan (KPKM), telah menerima kunjungan hormat daripada Encik Zhou Xiaoli, *Secretary of the Party Committee and Director-General, Hunan Provincial Supply and Marketing Cooperative Union* pada 3 November 2025 sempena lawatan kerja beliau ke Malaysia.

Wilayah Hunan yang terletak di kawasan tengah negara China terkenal dalam pengeluaran makanan seperti teh, limau (*citrus*) dan padi, serta pembangunan sistem pasaran hasil tani, inovasi pertanian dan jaringan koperasi tani. Dalam pertemuan ini, delegasi Hunan menyatakan minat untuk memperkukuh perdagangan dan meneroka peluang kerjasama ekonomi dengan Malaysia dalam sektor agro-makanan.

Malaysia turut menyatakan hasrat untuk meneroka peluang kerjasama dalam beberapa bidang utama, termasuk pengeluaran jagung bijirin untuk makanan ternakan (*grain corn*) bagi mengukuhkan rantai bekalan makanan haiwan, mekanisasi dan automasi pertanian melalui penerapan teknologi moden bagi meningkatkan produktiviti sektor agro-makanan negara, penternakan moden bagi khinzir (*modern pig farming*) serta pembangunan dan pelaburan dalam industri benih (*seed development*), khususnya dalam sektor padi, bagi menyokong daya tahan dan inovasi dalam pengeluaran makanan negara.

Pada tahun 2024, nilai perdagangan dua hala sektor pertanian antara Malaysia dan China telah mencecah RM45.31 bilion. Eksport Malaysia berjumlah RM23.43 bilion, meliputi pelbagai produk makanan. Import dari China pula merangkumi antara lain

sayuran dan buah-buahan, menjadikan China rakan dagang utama Malaysia dalam sektor pertanian global.

Selain itu, Datuk Seri turut memaklumkan mengenai kejayaan Malaysia mengeksport sarang burung (*edible bird's nest*) dan durian segar ke China, serta menzahirkan harapan agar lebih banyak produk makanan halal Malaysia menembusi pasaran China. Malaysia juga berharap untuk meningkatkan eksport produk perikanan dan makanan laut ke negara tersebut.

Kunjungan ini menunjukkan komitmen berterusan kedua-dua pihak untuk memperkukuh hubungan strategik dalam sektor agro-makanan, sejajar dengan usaha Malaysia mempertingkatkan jaminan bekalan makanan dan rantaian pertanian.

Dikeluarkan oleh:

KEMENTERIAN PERTANIAN DAN KETERJAMINAN MAKANAN

